

摘藻堂四庫全書薈要

集部

欽定四庫全書薈要

集部  
御選宋詩卷六十一

詳校官原任主事<sub>臣</sub>李斯咏



欽定四庫全書薈要卷一萬八千三百六十八

集部

御選宋詩卷六十一

五言絕句一

徐鉉

自題山亭

跂石仍臨水披襟復挂冠  
機心忘未得棊局與漁竿

寇準

南浦

春色入垂楊煙波漲南浦落日動離魂江花泣微雨

有懷

秦川春晚晚漢水路迢迢不待憑危檻離魂已暗銷

紙鳶

碧落秋方靜騰空力尚微清風如可託終共白雲飛

春雨

散亂縈花塢空濛暗柳堤望迴腸已斷何處更鶯啼

聞笛

平野人歸後孤城日落時西風聞一笛惆悵憶桓伊  
殘月

光隨春漏細影共夕煙流若近明河沒還疑墮玉鉤  
送人遊邊

遠行當歲暮水溜路難分足馬陽關外邊聲落日聞  
送轉運梅學士遊邊郡四首

帳飲惜離羣窮邊去路分雪深山館夜孤雁背燈聞  
絕塞程方遠窮陰歲欲殘石城歸夢斷隴月照人寒

水遠沉來信山長疊去愁夜深闌月白休凭驛邊樓  
風駕巡邊徼歸程隔亂山長安花木麗春苑待君還  
長安春望感懷

灞岸春波遠秦川暮雨微凭高正愁絕煙樹更斜暉  
送人往嶺表

炎方君此去旅恨杳何窮海樹瘴煙黑蠻村山路中  
途次

沙澗戍樓迥風高邊日清遲遲驅足馬何處問歸程

王曾

立春帖子

北陸凝陰盡千門淑氣新年年  
金殿裏寶字帖宜春

鮑當

松江夜泊

舟閑人已息林際月微明  
一片清江水中涵萬古情

孤雁

寒多稻梁少萬里孤難進  
不惜充君庖為帶邊庭信

晏殊

孟蘭盆

紅白薇英落朱黃槿豔殘  
家人愁溽暑計日望孟蘭

陳堯佐

昭慶寺

湖邊山影裏靜景與僧分  
一榻坐臨水片心閒對雲

范仲淹

江上漁者



江上往來人但愛鱸魚美君看一葉舟出沒風波裏

南園

南園萬樹花極目春芳麗林下老成人相招植松柱

行歌

行歌春滿路坐歌春滿園花前人自樂桃李豈須言

明月

明月照前墀朱絃奏流水清風如未回敢望無雲起

青郊

青郊鳴錦雉綠水漾金鱗願得郢中客共歌臺上春

舟中

珠彩耀前川歸來一扣舷微風不起浪明月自隨船

寄歐靜秀才

君歸一水遙魂斷木蘭橈賴有南軒竹清風慰寂寥

越上聞子規

夜入翠煙啼晝尋芳樹飛春山無限好猶道不如歸

淮上遇風

一棹危於桀傍觀亦損神他時在平地無忽險中人

出守桐廬道中十首

錄三首

分符江外去人笑似騷人不道鱸魚美還堪養病身  
素心愛雲水此日東南行笑解塵纓處滄浪無限情  
滄浪清可愛白鳥鑑中飛不信有京洛風塵化客衣

江城對月

南國風波遠東門冠蓋回多情是明月相逐過江來

和李光化秋詠四首

曉

牆外轆轤響樓前河漢歌曙光和月色猶記早朝時

晝

日色清如照前林葉未零海東新隼至一點在青冥

晚

晚色動邊思去年猶未歸戍樓人已冷目斷望征衣

夜

春色人皆醉秋光獨不眠君看明月下何似落花前

文彥博

題龍潭寺

古寺依青嶂高軒俯碧潭山僧如有待先掃侍中庵

夏英

公之  
庵

趙抃

書院

雨久藏書蠹風高老屋斜鄰居盡金碧一一梵王家

歐陽修

伊川泛舟

春谿漸生溜演漾迴舟小沙禽獨避人飛去青林杪  
自菩提步月歸廣化寺

春巖瀑泉響夜久山已寂明月靜松林千峰同一色  
晚過水北

寒水消積雪凍浦漸通流日暮人歸盡沙禽上釣舟  
遠山

山色無遠近看山終日行峰巒隨處改行客不知名

初秋普明寺竹林小飲餞梅聖俞分韻得亭臯  
木葉下五首

臨水復欹石陶然共醉醒  
山霞坐未斂池月來亭亭  
洛城風日美秋色滿蘅臯  
誰同茂林下掃葉酌松醪  
野水竹間清秋山酒中綠  
送子此酣歌淮南應落木  
勸君芙蓉杯欲褰芙蓉葉  
垂楊礙行舟演漾回輕櫂  
山水日已佳登臨同上下  
衰蘭尚可採欲贈離居者

和梅聖俞杏花

誰道梅花早殘年豈是春何如豔風日獨自占芳辰

花山寒食

客路逢寒食花山不見花歸心隨北雁先向洛陽家

和聖俞百花洲二首

野岸谿幾曲松蹊穿翠陰不知芳渚遠但愛綠荷深  
荷深水風濶雨過清香發暮角起城頭歸橈帶明月

春帖子詞

皇后閣



藹藹珠簾日溶溶碧瓦煙漪漣來苐水和暖浴蠶天

夫人閣

太史頒時令農家候土牛青林自花發黃屋為民憂  
元會千官集新春萬物同測圭知日永占歲喜時豐

端午帖子詞

皇帝閣

舜舞來遐俗堯仁浹九區五兵消以德何用赤靈符

皇后閣

繭館覆柔桑新絲引更長  
紉為五色縷續壽獻君王

夫人問

鳴蜩驚早夏鬪草及良辰  
共薦菖華酒君王壽萬春  
黃金仙杏粉赤玉海榴房  
共鬪今朝勝盈檐百草香

梅堯臣

寒草

寒草纔變枯陳根已含綠  
始知天地仁誰道風霜酷

月暈

月暈已知風燈花先作喜明日挂帆歸春湖能幾里

和資政侍郎湖亭雜詠絕句十首

錄六首

蓮塘

不畏塘雨急蓮葉自相遮文禽忽驚去衝落波上霞

稻畦

淺淺碧水平青青稻苗長偏知楚客愛白鷺飛下上

苔徑

林間夏雨滋復有斜陽照綠淨不搖風從教春草笑

流泉

石齒嚼寒聲  
粼粼縈曲處  
有時浮落英  
又過城東去

漁艇

古木剝為舟  
野藤牽作纜  
釣人寒雨中  
遠望煙蓑暗

拒霜

木杪芙蓉花  
開非紅豔  
早常畏晚霜  
寒朱華競衰草

雜詩絕句十七首

錄四首

荒水浸籬根  
籬上蜻蜓立  
魚網挂遶籬  
野船籬外入

岸傍草樹密往往不知名其間有啼鳥似與船相迎  
沙頭風雨來帖水野雲黑如觀曹公營萬弩射船側  
前時雙鴛鴦失雌鳴不已今更作雙來還悲舊流水

劉敞

清明後雁

留滯江南久今來萬里歸春風稍和暖作意入雲飛  
寄書

區脫逢歸驛作書憑寄聲那知夢識路先入大梁城

紅玉誰家女

紅玉誰家女雙瞳似水流映花笑漢使不覺墜搔頭  
紅玉誰家女明豔奪青春羞人不得語含笑却成嘔  
翠霞金縷衣獨立翳斜暉無柰春風蕩吹人只欲飛  
春風能吹衣不能解人意使我為朝雲與君從此逝

黃庶

和劉卿材十詠

錄二首

紅樹

幾樹濃於茜斜陽景最幽忽因風雨盡全減十分秋

水鴨

憶在山中日溪邊把釣鉤相逢恐驚起招手却回舟

姚嗣宗

題驛壁

踏破賀蘭石掃清四海塵布衣能辨此可惜作窮人

唐詢

顧野王讀書處

平林標大道曾是野王居往事將誰語淒涼六代餘

邵雍

夏日南園

夏木無重數森陰翠樾低相呼百禽語大半是黃鸝

張俞

蠶婦

昨日到城郭歸途淚滿巾遍身羅綺者不是養蠶人

司馬光



梅花

塞北為君戍江南是妾家遙知關外雪正似嶺頭花  
驛使何時發憑君寄一枝隴頭人不識空向笛中吹  
登長安見山樓

到官今十日纔得一朝閒歲晚愁雲合登樓不見山  
放鸚鵡

野性思歸久籠樊今始開雖知主恩厚何日肯重來  
皇帝閣春帖子詞

肇履璇璣歷重飛  
緹室灰寒隨土牛  
盡暖應斗車回  
鸞路迎長日  
農祥正曉天  
九垓同燠沐  
萬物向蕃鮮  
盛德方迎木  
柔風漸布和  
省耕將效駕  
擊壤已聞歌  
候雁來歸北  
寒魚涉負冰  
相鳥風色改  
暘谷日華升

范鎮

望湖臺

臺上望城下  
迢遙知幾尋  
湖光隱隱見  
多礙柳煙深

王安石

霹靂溝

霹靂溝西路柴荆四五家  
憶曾騎款段隨意入桃花

北山游亭

西崦水泠泠  
汭岡有游亭  
自從春草長  
遙見祇青青

紅梅

春半花纔發  
多應不耐寒  
北人初未識  
渾作杏花看

山中

隨月出山去  
尋雲相伴歸  
春晨花上露  
芳氣著人衣

送王補之行風忽作因題四句於舟中

淮口西風急君行定幾時故應今夜月未便照相思

南浦

南浦隨花去迴舟路已迷暗香無覓處日落畫橋西

江上

江上漾西風江花脫晚紅離情被橫笛吹過亂山東

雜詠

已作湖陰客如何更遠遊章江昨夜月送我到揚州

送丁廓秀才歸汝陰

風駛柳條乾  
駝裘未勝寒  
慙慙陌上日  
為客暖征鞍

梅花

牆角一枝梅  
凌寒獨自開  
遙知不是雪  
為有暗香來

韓維

和晏相公湖上

霧霽山高牖  
天寒水落沙  
試披深岸草  
往往見黃花  
穫水登紅稻  
篙舟割紫菱  
盃盤見秋物  
江海思飛騰

風枝挂危葉飛動夕陽中莫遣兒童撼留看著露紅

城西書事五首

蔬畦遶茅屋林下轆轤遲霜蔓已除架風瓢空挂籬  
朱果繁霜後甘甜半自零忽驚林色曙零落見殘星  
犬吠村墟改人移井臼空誰家收粟罷林脚有遺蓬  
松陰不可憇冷冽恐飛霜時有高風過乾花落石牀  
野竹蒙荒塹寒花亂廢墟秋郊足幽事直欲帶經鉏

徐秘校過池上見訪留二絕句

樽酒浮多蟻舟蓬覆似蝸折楊爭貫鯉編竹自撈蝦  
憐君此休駕長日坐傾斜山雨催行酒林煙候煮茶  
祖無擇

袁州慶豐堂十閑詠

錄四首

吏散鈴齋掩閑眠到日斜無端是春夢容易繞京華  
青山日相對閑看白雲生誰謂無心出中含濟物情  
曉按三杯後閑烹北苑茶色香俱絕品雪泛滿甌花  
雨霽輕埃息閑吟面曲池遊鱗時對擲雙破碧漣漪

程師孟

執爨

吹火鶯脰斂投柴玉腕斜回看煙裏面恰似霧中花

馮山

閬中蒲氏園亭十詠

錄四首

方湖

蒲柳春陰重禽魚晚景多輕舟乘酒去明月扣舷歌

芙蓉溪



野景宜花看秋芳近水多溪流光不斷千尺粉紅羅

涵碧亭

日影搖吟筆煙光落酒杯猶嫌池外俗移入鏡中來

草庵

竹影搖金翠泉聲響珮環庵前春日落人向定中還

沈溝

甓社湖

青天澹無雲白水水平無波拖舟鏡中行柰此清絕何

書寢

衙退冠珮捐吏休簿書却山城賓客稀永日卧高閣

文同

蒲氏別墅十詠

錄二首

方湖

風交蒲葦亂煙斷鳬鶩飛日暮一笛起扁舟垂釣歸

芙蓉溪

曉靄滋花色晴輝發水光何人露新纈不管著秋霜

閬州東園十詠

錄五首

四照亭

畫箔褰何礙，珍叢發已圓。  
願公皆遍賞，莫為一隅偏。

柳橋

接風誇晚態，垂雨怯春寒。  
為問題芳意，誰同倚畫欄。

曲池

水似珠璫入池如，玉鏡開臨流。  
唯自適魚鳥，莫相猜。

花塢

繚繞穿紅萼爛斑踏紫苔誰將錦步障端為使君開

蘭欄

玉筍齊抽日金釭競列時自然俱可愛莫放畫簾垂

守居園池雜題

露香亭

宿露濛曉花婀娜清香發隨風入懷袖累日不消歇

溪光亭

橫湖決餘波漈漈瀉寒溜日影上高林清光動窗牖

寒蘆港

落月照永湖曉氣何太爽  
兩岸雪煙昏鳬鷗出深港

蘇軾

留題石經院三首

蔥蒨門前路行穿翠密中  
却來堂上看巖谷意無窮  
天矯庭中檜枯枝鵲蹋梢  
瘦皮纏鶴骨高頂轉龍腰  
窈窕山頭井潛通伏澗清  
欲知深幾許聽放轆轤聲

初入廬山

青山若無素偃蹇不相親要識廬山面他年是故人  
自昔懷清賞神遊杳靄間如今不是夢真箇是廬山  
芒屨青竹杖自挂百錢游可怪深山裏人人識故侯

雍秀才畫草蟲七物

錄二首

促織

月叢號耿耿露葉泣漙漙夜長不自暖那憂公子寒

蟪蛄

洪鐘起暗室飄瓦落中庭誰言轉丸手能作殷牀聲

書劉景文所藏宗少文一筆畫

宛轉回紋錦  
繁盈連理花  
何須郭忠恕  
匹素畫縑車

寄虎兒

獨倚枕榔樹  
閒挑華撥根  
謀生看拙否  
送老此蠻村

儋耳山

突兀隘空虛  
他山總不如  
君看道旁石  
盡是補天餘

題贈田辨之琴姬

流水隨絃滑  
清風入指寒  
坐中有狂客  
莫近繡簾彈

靈上訪道人相遇

花光紅滿闌  
草色綠無岸  
不逢青眼人  
長歌白石澗

蘇轍

和文與可洋州園亭三十詠

錄六首

湖橋

湖南堂宇深  
湖北林亭遠  
不作過湖橋  
兩處那相見

橫湖

湖裏種荷花  
湖邊種楊柳  
何處渡橋人  
問是人間否



書軒

綠竹覆清渠塵心日日疎使君遺癖在苦要讀文書

水池

水深冰亦厚滉蕩鋪寒玉好在水中魚何愁池上鷺

寒蘆港

蘆深可藏人下有扁舟泊正似洞庭風日暮孤帆落

泠泠谷

層崖落飛泉微風泛喬木坐遣谷中人家家有琴筑

皇帝閣端午帖子詞

溽暑避華構清風迎早朝  
楓槐高自舞冰雪晚初消  
南訛初應歷五日未生陰  
靈藥收農錄薰風拂舜琴  
遺老齋絕句

久無叩門聲剥啄問何故  
田中有人至昨夜盈尺雨  
蔣之奇

萍鄉即事

地接長江近鄉名自古聞  
毛山千嶂雪玉女一墩雲

孔武仲

關山

嶺盡還臨水溪窮又有山人遊明鏡裏鳥語白雲間

孔平仲

曹亭三絕句

外看江水長裏見荷花發廬阜收白雲南浦浸明月  
漾舟荷花裏艤棹綠楊陰却上曹亭望山高江水深  
登臨常患遠游覽不能繼此景對門牆復興日三四

寄內

試說途中景方知別後心  
行人日暮少風雪亂山深

郭公

枉渚潮初落平岡日又西  
蘆叢深處泊惟有郭公啼

池上作

寂歷人初定逍遙物已齊  
夜涼天似水月在小橋西

米芾

題濮王宗漢畫蘆雁二首

偃蹇汀眠雁蕭梢風觸蘆京塵方滿眼速為喚花奴  
野趣分苔水風花剪雪湖塵中不作惡為有鄴公圖

賀鑄

懷寄冠元弼王文舉十首

初別後

樽酒津亭別還城何所投無情是流水斷送到南州

過碧蘆軒

東軒美風月詩酒半歡呼昨日牆陰過依依見碧蘆

出小市門

小市門南路舊遊聯馬行祇從前日別秋草一番生

登飛鴻亭

南京一登眺朔雁正來賓好去長淮北殷勤訪故人

游百步洪

百步洪頭水秋霖一夜渾相携濯纓處無復履綦痕

登黃樓

何處延明月東城尺五樓故人那得見後夜是中秋

局中歸

不見西街客歸來即閉門胡牀面南樹烏鵲噪黃昏

招元弼

暑雨茅柴熟秋風淮白肥留連阮校尉何日跨驢歸

招文舉

後夜溪山雪臨門望子猷莫因清興盡半道却回舟

賦後詩

偶得悲秋句還驚舊社空中庭步明月朗詠與西風

春晚樓上

楊花吹復盡春色但茫茫獨立西樓上持情向夕陽

和陳傳道秋日十詠

錄四首

秋晴

歸雲去悠悠長風來獵獵簷角兩長楸斜陽曬黃葉

秋夜

病骨倦空林曳杖閒庭步暗燭與寒蟲迢迢思風露

秋曉



未卷半簾霜猶疑在庭月倚樹汲清泉疎風獵華髮

秋月

霜空出華月樽酒聊相對別夜復嬋娟故人千里外

和同行潘生悒悒復悠悠二首

悒悒復悒悒愁眠成夢泣薄暮落花天高樓面風立  
悠悠復悠悠淚寄東風流所思悵何許西北齊雲樓

懷寄清涼和上人

試問江南客何時肯渡杯多情是湖水每日石頭來

長安在何許二首

長安在何許疑在青天上  
矯首遡西風浮雲斷人望  
長安在何許疑在白日下  
徘徊天一隅華月生新夜

張舜民

紈扇

紈扇本招風曾將熱時用  
秋來挂壁上却被風吹動

郭祥正

春水綠波

春江波自綠不染木蘭舟只與岸邊草依依添客愁  
簡寂碧溪亭

山光與溪色一碧瀉雲中倚檻久未去更聽松上風  
寄漳州詩僧緣進

一彈弦一絕思君腸百結雁過無書來立盡松間月  
和楊公濟錢塘西湖百題

錄二十首

柳洲

春光湖水滿春色柳洲深莫作風中線條條繫客心

巾子山

嵯峨插天頂寒翠灑湖光吟客搖船子猶疑漉酒香

閒泉

人去泉長在人忙泉自閑不供魚鳥飲只是照青山

西村

遠近皆僧刹西村八九家得魚無賣處沽酒入蘆花

合澗橋

兩澗飛來處雲深合一橋更無岐路別從此入煙霄

北高峰

翠出諸峰上湖邊正北看夜深雲霧散獨挂斗杓寒

白雲峰

湖上峰爭碧此峰藏白雲雲光連月色鷗鷺亦迷羣

葛塢

二葛繼成仙猶存鍊丹處有時化鶴來徘徊不知去

渦渚東嶼

小嶼春歸後青蒲渦渚東日高漁鳥散煙澹一林風

石門澗

啓閉何人見湍流一澗分  
仙家無路入空鎖石樓雲

伏龍澱

潭心有伏龍急溜和雲澱  
頭角何時成願借風雷便

西溪

西溪在湖外一派濯殘陽  
游子託漁艇却愁歸路長

見山亭

遊子一凭欄遍看湖上山  
不須飛鳥去已在畫屏間

客兒亭

翻經人已去誰為立幽亭一望野雲白半藏山骨青

稽留峰

孤峰出天外客到亦稽留不覺月華晚澗猿啼更愁

大慈塢

十刹密相望林開一塢香木魚聲漸急山衲下雲房

翠樾堂

深堂待遊客老木競留春花發多臨水雲開始見人

映發亭

吳越江分斷山光還映發  
白鳥東飛來應隨渡江月

南屏山

真山反如假疊徑入雲屏  
不借湖光洗朝朝潏黛青

長橋

橋短故名長路穿雲水鄉  
遊人欲歸去濯足弄殘陽

楊傑

題陳令壁



地勝汗山國風清令尹家  
酒闌寒食夜月上海棠花  
徐賢亭偶成

湖外青山在湖邊人不歸  
古今無問處幽鳥下漁磯  
送陳令歸無為

楚水漾輕碧楚花飛亂紅  
故人故鄉去半雨半晴中  
野寺

澤國春風老雜花間芳草  
門前車馬稀竹葉無人掃  
滴滴泉

巖谷連天嶺杉松徹象山路從雲外入人自海邊還

潘興嗣

大梵院

蕭蕭竹上風瑟瑟澗下水中梵晚更幽人禽聲亦喜

俞紫芝

松

萬壑搖蒼煙百灘渡流水下有跨驢人蕭蕭吹醉耳

袁陟

宴坐巖

霜路凝空白松杉  
斂翠陰泉聲月中冷  
山色暝來深

陳詵

和祖擇之袁州慶豐堂閒詠

秀泉開舊甃初試仰山茶寂寂有餘意  
池蓮三五花

郊僑

訪凌峰賢上人

步入凌峰閣尋師師未歸  
凭欄寂無語惟見白雲飛

黃庭堅

題畫雁

水國鴻雁秋烟沙風日麗莫遣角弓鳴驚飛不成字  
題花光為魚公卷作水邊梅

梅蕊觸人意冒寒開雪花遙憐水風晚片片點汀沙  
戲詠蠟梅

金蓓鎖春寒惱人香未展雖無桃李顏風味極不淺  
體熏山麝臍色染薔薇露披拂不滿襟時有暗香度

離福巖

山下三日晴山上三日雨不見祝融峰還泝瀟湘去

和涼軒

打荷看急雨吞月任行雲夜半蚊雷起西風為解紛

秦觀

題趙團練畫江干曉景

公子歌鐘裏何從識渺茫惟應斗帳夢曾到水雲鄉  
曉浦煙籠樹春江水拍空煩君添小艇畫我作漁翁

晁補之

國子監暮歸

杖履清晨往縑囊薄暮歸閒官廳事冷蝴蝶上堦飛

題宗室大年畫扇

西風入叢竹慘澹帶秋陰驚起中泚雁衡陽萬里心

晁說之

遣愁

白盡汀蘋老黃凋岸草秋西風正蕭瑟何處不堪愁

晁冲之

與秦少章題漢江遠帆

楚山全控蜀漢水半吞吳老眼知佳處曾看八境圖  
江山起暮色草木斂餘昏誰感離騷賦丹青弔屈原  
雲埋鳳林寺浪打鹿門山今日江風惡郎船勸不還  
江闊雁不到山深猿自迷傳聞杜陵老只在灊東西  
石似浣紗石江如濯錦江征帆向何處雲霧晦蓬窗

龍興道中

澗道垂黃花山城擁紅葉人爭小舟渡馬就平沙涉

謝任伯久無書常子然寄茶謝之因簡任伯

諫議茶猶送郎官迹已疎斜封三道印不奉一行書

次韻陳叔易蘆橋

橋闊狹如馬蘆高低似人白蘋洲上客枉恨洞庭春

陳師道

和豫章公黃梅

色輕花更豔體弱香自永玉質金作裳山明風弄影



黃梅

異色深更晚生香故觸人不施千點白別作一家春  
冉冉梢頭綠婷婷花下人欲傳千里信暗折一枝春  
巨野二首

紅落芙蓉晚青深蒲稗秋平湖無過鳥鳴鼓有行舟  
蒲港侵衣綠蓮塘亂眼紅將身供世事結纜待回風  
夜句

老樹仍孤秀秋蟾只獨明何須夜來雨却聽枕前聲

短短長長柳三三五五星斷雲當極目不盡遠峰青

雁

來往違寒暑飛鳴在稻梁未知溟海大不肯過衡陽  
截水無留影哀空有斷雲翅開先作字行斷不成羣

晚遊九曲院

冷落叢祠晚回斜狹路賒平荷留夜雨驚鳥過鄰家

洪炎

袁遯翁雲溪居

水竹依山住煙霞並舍分秋添中夜雨冷沒一溪雲  
劉弇

次韻譚令尹茅庵

罇月明窗紙涼竿掃徑塵却應環堵在瀟灑屬吾人  
丈室纔驚子神遊殆化人公乎聊寄迹肯此負朝紳

陳瓘

秀聚亭

曉色春風裏維舟一小亭看山渾不倦坐待雪峰青

馬上

策馬帶殘星郊原破暑清人間千萬事併入一時情

劉安上

萬田道中

水闊疑無路雲深僅有山兒童划小艇出沒稻塍間

花靨鎮

下蔡嬉遊地春風萬杏繁誰家堪繫馬青壁竹籬門  
花靨誰名鎮梅妝自古傳家家小兒女滿額點花鈿

唐庚

栖禪歸書所見

雨在時時黑春歸處處青山深  
失小寺湖盡得孤亭春著湖煙  
膩晴搖野水光草青仍過雨山  
紫更斜陽

崔鷗

春日

落日不可盡丹林紫谷開明明  
遠色裏歷歷暝鴉回

題績溪雪峰樓

題詩最高處不為待人看記著今朝勝山明松雪寒

韓駒

梅花

山居有幽思小雪破梅心的皦明陰壑玲瓏挂晚林  
吹香撩遠興弄影慰孤斟剩欲留長在霜枝半不禁

題花長老

曉出花光寺雲沙滿眼新歸來看圖畫借問若為真  
昨欲浮湘去褰裳望九疑清湘今入手一棹更何之

傅察

雪

都城十日雪戶庭皓已盈呼兒試輕掃留伴小窗明  
春雷忽隱隱春雪復紛紛農夫戒及澤荷鍤已成雲  
夢覺

日永不可過夜涼愁更多蟬聲鳴曉月孤枕夢如何  
思家

一別遽如許歸期可柰何無心戀明月有淚寄流波

張表臣

詠碧筍酒

釀憶青田核觴宜碧藕筍直須千日醉莫放一杯空

汪藻

北窗

睡起無一事怡然盼庭柯綠陰微缺處最得南颺多

廖剛

次韻當時官長院中三絕句



柳嫩風吹綠花嬌雨妬香欲憑義馭緩莫遣負韶光  
簷雀矜巢噪桑鳩喚婦鳴客愁饒餽釘牆外賣花聲  
畫舸便春漲驕驄惜障泥歸知何所愜煙柳子陵溪  
還憩旅店茅軒

茅軒有何好小駐客心寬始覺安居樂無如行路難  
李彌遜

遊梅坡席上雜酬

醉帽迎風落春衣日徑斜花梢密藏路隱約見山家

花擁山頭白雲翻日脚斜銀蟾已照落遊客莫思家  
席上次邵文伯韻

月色漾明玉花光揚素波醉吟吾豈敢能賦屬陰何  
周紫芝

舟中曉色

望處天仍闊雲邊雨未成秋風莫吹散留作打篷聲  
風急雨初過天高日未曛翠鬟堆晚岫水墨畫秋雲

題錢少愚四畫

鴛浦

一點傷春恨看成兩髻霜如今無此夢莫畫兩鴛鴦

釣雪

一昨東吳去回頭又十年可憐江上雪空落釣魚船

蘭亭

事去空千載何曾有若人只應煙樹裏便是永和春

秋觀

雨足三湘岸煙含七澤秋可能無尺地分得庾郎愁

御選宋詩卷六十一

欽定四庫全書薈要卷一萬八千三百六十九

集部

御選宋詩卷六十二

五言絕句二

呂本中

題蘆雁扇

雁下秋已晚  
江天風雨微  
寧為聚沙立  
不作傍雲飛

夜雨

夢短添惆悵  
更深轉寂寥  
如何今夜雨  
只是滴芭蕉

夢

夢入長安道萋萋盡春草  
覺來春已去一片池塘好

陳與義

同家弟賦蠟梅詩得四絕句

朱朱與白白著意待春開  
那知洞房裏已傍額黃來  
韻勝誰能舍色莊那得親  
朝陽一映樹到骨不留塵  
黃羅作廣袂絳帳作中單  
人間誰敢著留得護春寒  
一花香十里更值滿枝開  
承恩不在貌誰敢鬪香來

題持約畫軸

日落川更闊烟生山欲浮舟中有閑地載我得同遊

出山

山空樵斧響隔嶺有人家日落潭照樹川明風動花

入山

出山復入山路隨溪水轉東風不惜花一暮都開遍

衡嶽道中

城中望衡山浮雲作飛蓋竭來巖谷遊却在浮雲外

絕句

野鴨飛無數桃花溼滿枝竹輿鳴細雨山客有新詩

九月八日戲作兩絕句示妻子

錄一首

小甕今朝熟無勞問酒家重陽明日是何處有黃花

沈與求

次韻曾守立春席上七絕句

錄五首

澤國春歸早連門競築臺夜來風力峭疎片半飄梅  
曉凍穿流急晨光照火新四郊和氣合歌吹待班春



日應東風轉春隨北斗回不須鄒子律餘暖到寒茱  
曉卜農祥正遙知歲事豐小桃如有意欲吐故時紅  
曲席紛羅綺中腔度管絲歡聲連萬井一一擁春旗  
程俱

書壽昌驛

歲暮白日速風高黃葉稀歸心與寒雁一夜向南飛  
徐俯

白鷺洲

金陵與廬陵俱出白鷺洲相望萬里江中同二水流

雙廟

開元天寶間衮衮見諸公不聞張與許名在臺省中

陳淵

楊花

漫天方作雪糝徑忽鋪氈已是春如酒那堪爾似綿

題綠波亭

南浦江波綠陽關柳色青夕陽千古恨分付短長亭

朱松

雨

撼撼初鳴竹  
涓涓稍滴簷  
忽然幽夢斷  
更覺曉寒添  
纖纖花入麥  
漫漫雨黃梅  
泥徑無人度  
風簾為燕開

五言小詩

散策橋南路  
春容最好時  
夢回花滿眼  
猶恐是辛夷  
牛歸坡草暖  
船繫岸花零  
白墮尊同卧  
黃昏月照醒

朱棹

春間小詩書趙園壁追錄之

小語不知夕幽香無盡時影寒人欲醉明月照醅釀

鄭剛中

春到村居好四絕

春到村居好茅簷日漸長杯深新酒滑焙煖早茶香  
春到村居好園林興味長蠶貪桑眼出蜂趁蜜脾忙  
春到村居好枯腸飽可圖筍尖將露角麥秀欲生鬚  
春到村居好清明欲禁烟亂紅桃下雨輕白柳飛綿

劉子翬

雜題

積雨生秋意，浮陰放晚晴。  
鐘聲寒野迴，橋影小溪清。  
簷溜停清瀉，林聲息怒號。  
水浮秋色遠，山帶夕陽高。  
宿雁猶驚渚，昏鷗已著林。  
野平雲散亂，江動月浮沉。

石峰春靄

寒山遠欲無，春在冥濛處。  
何如掃浮陰，盡放岩光露。  
潭溪秋碧

秋空晚自明孤烟澹難起適意一枝筇時來對寒水

韭

肉食嘲三九終憐氣韻清一畦春雨足翠髮剪還生

子薑

新芽肌理膩映日淨如空却似勻妝指柔尖帶淺紅

蘿蔔

密壤深根蒂風霜已飽經如何純白質近蒂染微青

池蓮四詠

葉

郁烈香浮雨團圞綠蔭波近堤千葉亂知有畫船過

花

孤紅低映岸併豔遠連汀露浥層層轉風披葉葉零

藕

密蘊羅紋細明含玉色清冰盤時薦美刀菰斷絲輕

子

分房圓戢戢弄色翠娟娟摘實憐空蒨方知雨露偏

一樹

一樹梅開早清香襲客卮夕陽簫鼓散半是折殘枝

晚宿

石瀨分流小霜林間樹紅暮橋橫隱約寒鍛響丁東

畫船

隱約菱歌斷斜陽水面移美人貪照影不覺畫船歌

鄭樵

福寧州藍溪寺前蒙井



靜涵空碧色瀉自翠微巔品題當第一不讓惠山泉  
周必大

皇帝閣春帖子

日向皇都永冰從太液融八荒開壽域萬國轉春風  
綵勝年年巧椒盤歲歲新君王千萬壽長與物華春  
暖律催花蘂晴暉活柳枝發生雖有信造化本無私  
紫禁風光早深仁奪化工試看澄碧殿池凍已全融  
選德庭前柳朝來漏泄春等閒施御箭穿葉捷於神

尤袤

聽鶯閣

春催金谷曉一望百花齊不作遼西夢從渠著意啼

范成大

小澗

石礙珠旒濺灘平霧縠鋪小童能好事繫馬剝菖蒲

雙燕

底處飛雙燕銜泥上藥欄莫教驚得去留取隔簾看

衡陽道中

桑下蕪菁晚高花出短籬茅簷少春事惟記浴蠶時  
黑殺鑽籬破花猪突戶開空山竹瓦屋猶有燕飛來

何同年書院

有丹竈  
甚推

竹色侵晚帙泉聲漱嵌根試通丹竈路應到老人村

初秋

急雨過窗紙新涼生簾藤蹒跚老鈴下來炷壁間燈

題徐熙杏花

老枝當歲寒芳蘂春澹注霧綃輕欲無嬌紅恐飛去

道中古意

桃李寂無言垂楊照溪綠不見苧蘿人空吟若邪曲

題蜀果圖四首

錄二首

木瓜

沈沈黛色濃糝糝金沙絢却笑宣州房競作紅妝面

櫻桃

火齊寶璫垂於綠繭絲幽禽都未覺和露折新枝

瑞香

一叢三百朶細細拆濃檀簾幕護花氣不知窗外寒

陸游

梅花

山月縞中庭幽人酒初醒不是怯清寒愁踏梅花影

題瑩上人二畫

錄一首

剡溪

天地又秋風谿山憶剡中孤舟幸閒住借我訪支公

題庠閣黎二畫

錄一首

秋景

秋山瘦嶙峋秋水渺無津如何草亭上却欠倚闌人

早春

西村一抹煙柳弱小桃妍要識春風處先生拄杖前

新秋以窗裏人將老門前樹欲秋為韻作小詩

十首

錄一首

殘暑無多日幽居近小江酒醒中夜起松月入山窗

柳橋晚眺

小圃聞魚躍橫林待鶴歸  
閑雲不成雨故傍碧山飛

幽事

矮紙來吳下長毫出宛陵  
自書霜夜句持寄剡中僧

山麓

草合路如線偶隨樵子行  
林間遇磬石小憩看春耕

楊萬里

董主簿正道壁間作水墨老梅一枝宿鵲縮脰

合半眼棲焉

斜枝飽風雪疎花淡水玉一鵲忍清寒居然伴幽獨

新寒

寒力欺誰得知儂典却衣暮禽差慰眼不作一行歸

湯田早行見李花甚盛

此地先春信年年只是梅南中春更早臘月李花開  
似妬梅花早同時鬪雪膚新年二三月還解再開無

近峽



望峽初愁遠當前忽不知如何船進處却在棹停時  
道上吟

樹影重重竹溪穿曲曲峰林深那有寺煙遠忽聞鐘  
城中雪一尺山中雪一丈地上都已消却在松柏上  
游寺

去歲遊春屐苔痕故可尋人家隨岸遠塔影落湖深  
客愛清殊絕僧愁凍不勝可憐兜率寺齋供一湖水

瑞香花新開十詠

錄六首

外著明霞綺中藏淡玉砂森森千萬筍旋旋兩三花  
小霧迎風起輕寒索幕遮香中真上瑞蘭麝敢名家  
老子親書倦昏然睡思來夢中誰喚醒窗外瑞香開  
短短重籬小團團錦帊圍浮陽烘酒思沉水著人衣  
茉莉通家遠柿花具體微春愁渾瘦盡別有瘦中肥  
紫袖染難透瓊膚晒轉香小留供鼻觀開去未須忙

六月二十三日題李亨之墨梅

夏熱秋逾甚寒梅暑亦開無塵管城子幻出雪枝來

秋暑

夏暑減未曾秋暑增愈劇老翁避無處茅齋聊憩息  
銀盆滿注水銀水同一色中涵雙桂影倒卧一天碧

寄題朱元晦武夷精舍十二詠

錄二首

寒棲館

鍊玉雲粘杵朝真露溼衣一聲夜半鶴月裏羽人歸

釣磯

月夜乘醉來垂竿玉溪曲水清無寸鱗釣得半輪玉

臙脂樓子

樓子臙脂色燈前豔更鮮看花直到曉今夕不成眠

登度雪臺

欲問金沙信聊登度雪臺碧桃良解事開過架梢來

薌林五十詠

錄八首

虎川

居士歌黃帽曾來照曉晴至今流瀲灩猶學詠詩聲

歸來橋

已賡彭澤辭更擬輞川詩未老還山了猶嫌歸較遲

柑子園

秋顆酣天濕春花咲國香鄉林親手種中有洞庭霜

放魚磯

為惜丹砂尾親投碧草潭前頭有香餌千萬不須貪

通幽徑

點檢苔花暈微茫拄杖痕醅醖幾開落山雨濕黃昏

桃李蹊

白雪堆穠李紅藍染靚桃晨妝須早看莫待月華高

有山堂

閤皂風烟外江西有小天茲山本無主撥入筆牀前

連輝觀

極目斜陽樹乘風落葉涼更和山與水併作一秋光

芍藥初生

芍藥新移處紅拳粲萬雛看來已可愛未問有花無

寄題葛元亨舍人園亭

意山

不識弁山面相逢笠澤詩祇應晚雲散玉立對門時

溪雲

門前三面山閣下一溪水雲出戲作霖却歸宿簷裏

與子上野步

籬落深深巷茅茨小小家冬晴好行脚何處不梅花

踏青

水換溪溪玉花呈嶺嶺春秧田喧處早茅屋補痕新

張孝祥

次東坡先生韻

微涼入船窗秋水滿湘浦過盡前頭灘只得夜來雨  
悠然望江南日出煙靄微倚門雙白髮屈指待兒歸  
漁師來賣魚船小風蕩漾得錢擎波去不怕江流漲  
朝發良方磯暮宿白水灣寬作一月程須見江南山

野牧圖

吳牛三十角久與牧相忘忽憶淮南路春風滿柘岡



秋晚稻生孫催科不到門人閑牛亦樂隨意過前村  
汪應辰

歸雲堂

浮雲本無心人心逐雲去更作歸雲堂雲歸竟何處  
洪适

海棠花

雨濯吳妝膩風催蜀錦裁自嫌生較晚不得嫁寒梅

洪邁

雙林寺見柳書

幽谷雙林寺荒涼得遠尋  
誠懸遺墨在諫筆想心箴

朱熹

丘子野表兄郊園五詠

柳

欲識淵明家離離疎柳下  
中有白雲人良非遯世者

荼蘼

結援遂芳植覆牆擁深翠  
還當具春酒與客花下醉

竹

移自溪上園種此牆陰路牆陰少人行來歲障幽戶

芭蕉

芭蕉植秋檻弗云憔悴姿與君障夏日羽扇寧復持

蔬圃

花柳遶宅茂先生在郊居下帷良已苦時作帶經鋤

宿山寺聞蟬作

林葉經夏暗蟬聲今夕聞已驚為客意更值夕陽曛

濯足澗水

濯足澗邊石山空水流喧行旅非吾事寄此一忘言

宿簣簞鋪

庭陰雙樹合窗夕孤蟬吟盤礴解煩鬱超搖生道心

寄山中舊知

淒涼梧葉變芬馥桂花秋日夕湖臯勝哦詩憶舊遊  
秋至池閣靜天高林薄疎西園有佳處那得與君俱

憶齋中

蟋蟀亂秋草故園風露深何因不歸去坐使百憂侵

聞蟬

悄悄山郭暗故園應掩扉蟬聲深樹起林外夕陽稀

雜記草木

天門冬

高蘿引蔓長插援垂碧絲西窗夜來雨無人領幽姿

紅蕉

弱植不自持芳根為誰好雖微九秋翰丹心中自保

扶留

根節含露辛茗穎扶援綠蠻中靈草多夏永清陰足

竹

種竹官牆陰經年但憔悴故園新綠多宿幹轉蒼翠

榴花

窈窕安榴花乃是西鄰樹墜萼可憐人風吹落幽戶

萱草

春條擁深翠夏花明夕陰北堂罕悴物獨爾澹冲襟

澆花

早起獨行園花藥發奇穎猶嫌墜露稀更汲寒泉井  
觀黃德美延平春望兩圖為賦二首

劒閣望南山

川流匯南奔山豁類天闢層甍麗西崖朝旦羣峰碧  
冷風望演山

方舟越大江凌風下飛閣仙子去不遠蒼屏倚寥廓  
題九日山石佛院亂峰軒

因依古佛居結屋寒林杪當戶碧峰稠雲煙自昏曉  
巖中老釋子白髮對青山不作看山想秋雲時往還

題可老所藏徐明叔畫卷

羣峰相接連斷處秋雲起雲起山更深咫尺愁千里

汲清泉漬奇石置熏爐其後香烟被之江山雲

物居然有萬里趣因作四小詩

錄三首

晴窗出寸碧倒影媚中川雲氣一吞吐湖江心渺然  
一水渺空濶羣山中接連寒陰白霧湧飛度碧峰前



隱几對寒碧忘言心自閒豈知宜寂士滅跡青峰間

杜詩

滅跡君山湖  
上之青峰

家山堂晚照效輞川體作

夕陽浮遠空西風背殘照爽氣轉分明與君共晚眺

奉同張敬夫城南二十詠

錄十五首

納湖

詩筒連畫卷坐看復行吟想像南湖水秋來幾許深

東渚

小山幽桂叢歲暮靄佳色花落洞庭波秋風渺何極

詠歸橋

綠漲平湖水朱欄跨小橋舞雩千載事歷歷在今朝

船齋

考槃雖在陸滉漾水雲深正爾滄洲趣難忘魏闕心

麗澤堂

堂後林陰密堂前湖水深感君懷我意千里夢相尋

蘭澗

光風浮碧澗蘭杜日猗猗竟歲無人采含薰祇自知

石瀨

疏此竹下渠漱彼澗中石暮館繞寒聲秋空動澄碧

卷雲亭

四山雲氣深徙倚一舒嘯浩蕩忽寧開為君展遐眺

柳堤

渚華初出水堤樹亦成行吟罷天津句薰風拂面涼

月榭

月色三秋白湖光四面平與君凌倒影上下極空明

琮琤谷

湖光湛不流嵌竇亦潛注倚杖忽琮琤竹深無覓處

聽雨舫

綵舟停畫槳客與得歌眠夢破篷窗雨寒聲動一川

梅堤

仙人冰雪姿貞秀絕倫擬驛使詎知聞尋香問煙水

采菱舟

湖平秋水碧桂棹木蘭舟一曲菱歌晚驚飛欲下鷗

南阜

高丘復層觀何日去登臨一目長空盡寒江列暮岑

題畫卷

吳畫

妙絕吳生筆飛揚信有神羣仙不愁思步步出風塵

鬼佛

冥濛罔象姿相好菩薩面鬼佛吾詎知水石玩奇變

范寬

山雄雲氣深樹老風霜勁下有考槃人超搖得真性

次劉秀野蔬食十三詩韻

錄九首

乳餅

清朝薦疎盤乳鉢有真味不用精瓊糜無勞爛羊胃

新筍

脩脩江上林白日暗風雨下有萬玉蚪三冬卧寒土

紫萼

誰將紫芝苗種此槎上土便學商山翁風餐謝肥瘠

子薑

本草云薑久食去臭氣通神明  
或云傷心氣不可多食者非是

薑云能損心此謗誰與雪請論去穢功神明看朝徹

南芥

黃龍記昔遊園客有佳遺不謂洛生吟輟餐時擁鼻

芋魁

沃野無凶年正得蹲鴟力區種萬葉清深煨奉朝食

筍脯

南山春筍多萬里行枯腊不落盤餐中今知綠如簍

豆腐

世傳豆腐本  
乃淮南王術

種豆豆苗稀力竭心已腐早知淮王術安坐獲泉布

白藟

聞說閬風苑瓊田產玉芝不收雲表露烹瀹詎相宜

題米元暉畫

楚山直叢叢木落秋雲起向曉一登臺滄江日千里

祝孝友作枕屏小景以霜餘茂樹名之因題此



詩

山寒夕飈急木落洞庭波幾疊雲屏好一生秋夢多

墨莊四詠

墨莊

詩書啓山林德義久儲積嗣世知有人新畬更開闢

靜春堂

幽人本何心偶此翳環堵隱几亦無言光風遍寰宇

玩易齋

竹几橫陳處韋編半掩時寥寥三古意此地有深期

君子亭

倚杖臨寒水披襟立晚風相逢數君子為我說濂翁

列岫望西山最正殆無毫髮遺恨滕王秋屏皆  
不及也因作此詩

城中望西山拄頰空朝暮不到列岫亭詎知親切處  
東西水平分南北山中判妙處毫髮間商略無遺算

次韻擇之進賢道中漫成

日暮重岡上人勞馬亦饑不妨隨野雀容易宿寒枝

劉德明彥集祝弟以夏雲多奇峰為韻賦詩戲

成五絕

出山幾何時歸來便長夏端居心不怡散策長林下  
為客厭城市還家辭世紛朝昏何所見但有四山雲  
閉門事幽討歲月忽已多客來無可問與君共絃歌  
干時本已懶胸次況無奇若問中林趣婆婆祇自知  
炎蒸不可柰雲氣滿前峰向夕風吹盡微聞遠寺鐘

百丈山六詠

石磴

層崖俯深幽微逕忽中斷努力一躋攀前行有奇觀

小澗

兩崖交翠陰一水自清瀉俯仰契幽情神襟頓飄洒

山門

置屋兩三間巧當奇絕處峽束百泉傾澗激回風度

石臺

出谷轉石稜俯身窺木末夕眺嵐翠分朝隰雲海濶

西閣

借此雲窗眠靜夜心獨苦安得枕下泉去作人間雨

瀑布

巔崖出飛泉百尺散風雨空質麗晴暉龍鸞共掀舞

雲谷二十六詠

錄二十一首

雲谷

寒雲無四時散漫此山谷幸乏霖雨安何妨媚幽獨

南澗

危石下崢嶸高林上蒼翠中有橫飛泉崩奔雜奇麗

瀑布

峰回危逕轉垂練忽千尋不為登山倦躊躇秋澗陰

雲關

白雲去復還黃塵到難入只有澗水聲出關流更急

杉逕

南起雲關口縈紆上草堂天風發清籟山月度寒光

雲莊

小丘橫翠几層嶂復嵯峨釋耒閒來看巖安此處多

泉硤

入關但平田復此得清響何必問真源神襟一蕭爽

石池

兩岸蒼峭石護此碧泓寒秋月來窺影驪珠吐玉盤

西寮

畬田種胡麻結草寄林樾珍重無心人寒棲弄明月

晦庵

憶昔屏山翁示我一言教自信久未能巖棲冀微效

草廬

青山繞蓬廬白雲障幽戶卒歲聊自娛時人莫留顧

懷仙

西望多奇峰北瞰獨仙府欲致武夷君石壇羅桂醕

揮手

山臺一揮手從此斷將迎不見塵中事惟聞打麥聲



雲社

自作山中人即與雲為友一嘯雨紛紛無勞三奠酒

桃蹊

澗裏春泉響種桃泉上頭爛紅紛委地未肯出山流

竹塢

峭菑桃蹊北蕭慘竹塢深不堪秋夜永風雨助悲吟

茶坂

攜羸北嶺西采擷供茗飲一啜夜窗寒跣趺謝衾枕

絕頂

當年赫曦臺移治在茲嶺寥廓無四鄰三光疑倒影

北澗

土斷川亦分北下成陰澗秀石得佳名服膺吾敢慢

澗有

仁義  
石

中溪

南下東嶺阿云是中溪道巖樹愛樛枝石田悲蔓草

休庵

別嶺有精廬林巒亦幽絕無事一往來茶瓜不須設  
元範尊兄示及十梅詩風格清新意寄深遠吟  
玩累日欲和不能昨夕自白鹿玉澗歸偶得數  
語

江梅

大雪天地閉窮陰渺寒濱誰知江南信已作明年春  
嶺梅

梅花破萼時瘴雨吹成雪驛使忽相逢無言似愁絕

野梅

野風吹孤芳迴立正愁絕  
皂蓋莫徘徊堪看不堪折

早梅

霜風殊未高杖策荒園裏  
仙子別經年相看共驚喜

寒梅

白玉堂前樹風清月影殘  
無情三弄笛遙夜不勝寒

小梅

且喜梅花開莫嫌梅花小  
花小風味深此意君已了

疎梅

玉笛未黃昏  
冰灘已清淺  
疎影不勝妍  
愁心為誰遣

枯梅

繆枝卧龍蛇  
冷蘂綴冰雪  
千里故人心  
今年為誰折

予家

居時劉平甫  
折此枝為贈

落梅

花開已淒涼  
花落更愁寂  
來歲煙雨時  
為君和鼎實

賦梅

君欲賦梅花梅花若為賦繞樹百千回句在無言處

武夷精舍雜詠

并序

武夷之溪東流凡九曲而第五曲為最深蓋其山  
自北而南者至此而盡聳金石為一峰拔地千尺  
上小平處微戴土生林木極蒼翠可玩而四隕稍  
下則反削而入如方屋帽者舊經所謂大隱屏也  
屏下兩麓坡坳旁引還復相抱抱中地平廣數畝  
抱外溪水隨山勢從西北來四屈折始過其南乃

復繞山東北流亦四屈折而出溪流兩旁丹崖翠  
壁林立環擁神剎鬼刻不可名狀舟行上下者方  
左右顧瞻錯愕之不暇而忽得平岡長阜蒼藤茂  
木按衍迤靡膠葛蒙翳使人心目曠然以舒窈然  
以深若不可極者即精舍之所在也直屏下兩麓  
相抱之中西南向為屋三間者仁智堂也堂左右  
兩室左曰隱求以待棲息右曰止宿以延賓友左  
麓之外復前引而右抱中又自為一塢因累石以

門之而命曰石門之塢別為屋其中以俟學者之  
羣居而取學記相觀而善之義命之曰觀善之齋  
石門之西少南又為屋以居道流取道書真誥中  
語命之曰寒棲之館直觀善前山之顛為亭回望  
大隱屏最正且盡取杜子美詩語名以晚對其東  
出山背臨溪水因故基為亭取胡公語名以鐵笛  
說具本詩注中寒棲之外乃植援列樊以斷兩麓  
之口掩以柴扉而以武夷精舍之扁揭焉經始於



淳熙癸卯之春其夏四月既望堂成而始來居之  
四方士友來者亦甚衆莫不歎其佳勝而恨他屋  
之未具不可以久留也釣磯茶竈皆在大隱屏西  
磯石上平在溪北岸竈在溪中流巨石屹然可環  
坐八九人四面皆深水當中窠臼自然如竈可爨  
以瀹茗凡溪水九曲左右皆石壁無側足之徑唯  
南山之南有蹊焉而精舍乃在溪北以故凡出入  
乎此者非漁艇不濟總之為賦小詩十有二篇以

紀其實若夫晦明昏旦之異候風煙草木之殊態  
以至於人物之相羊猿鳥之吟嘯則有一日之間  
恍惚萬變而不可窮者同好之士其尚有以發於  
予所欲言而不及者乎哉

錄八首

精舍

琴書四十年幾作山中客一日茅棟成居然我泉石

仁智堂

我慙仁智心偶自愛山水蒼崖無古今碧澗日千里

隱求齋

晨窗林影開夜枕山泉響  
隱去復何求無言道心長

止宿寮

故人肯相尋共寄一茅宇  
山水為留行無勞具雞黍

石門塢

朝開雲氣擁暮掩薜蘿深  
自笑晨門者那知孔氏心

鐵笛亭

山前舊有奪秀亭故侍郎胡公明仲  
嘗與山之隱者劉君兼道游涉而賦

詩焉劉少豪勇游俠使氣晚更晦迹自放  
山水之間善吹鐵笛有穿雲裂石之聲胡

公詩有更煩橫鐵笛吹與衆仙聽之句亭  
今廢久一日與客及道士數人尋其故址  
適有笛聲發於林外悲壯回鬱巖石皆震  
追感舊事因復作亭以識其處仍改今名

何人轟鐵笛噴薄兩崖開千載留餘響猶疑笙鶴來

茶竈

僊翁遺石竈宛在水中央飲罷方舟去茶煙裊細香

漁艇

出載長煙重歸裝片月輕千巖猿鶴友愁絕棹歌聲

木芙蓉

紅芳曉露濃綠樹秋風冷共喜巧回春不妨閒弄影

蕙

古所謂蕙乃今之零陵香  
今之蕙不知起於何時也

今花得古名旖旎香更好適意欲忘言塵編誰能考

木犀

喬木生夏涼芳蕤散秋馥未覺歲時寒扶疎方遶屋

菊

青葙冒珍叢幽姿含曉露政爾破荒寒詎免傷遲暮

邱子服來訪道間得古梅折以為贈劉叔通江

文卿俱來各有佳句因各次韻為答二首用叔

通韻 錄一首

獨樹臨孤岸橫枝放淺花不須煩驛使正耐雪斜斜

庚申立春前一日

雪花寒送臘梅萼暖生春歲晚江村路雲迷景更新

謁表伯余宋祐

江上雪意滿風吹竹林平先生但堅坐稚子問柴荆

題尤溪宗室所藏二妃圖 錄一首

湘夫人

瀟湘木落時  
玉佩秋風起  
日暮悵何之  
寂寞寒江水

醉作三首

七月二十六日夜

浙浙西風起  
候蟲寒夜分  
千山杳沉寂  
竟夕斷知聞  
浙浙西風起  
嗷嗷寒鴈多  
稻梁隨處有  
珍重采薇歌  
浙浙西風起  
濺濺石瀨鳴  
有情從是妄  
箇裏定無情

張栻

城南雜詠二十首

錄十四首

船齋

窗低蘆葦秋便有江湖思久已倦垂綸游魚不須避

麗澤

長哦伐木篇佇立以望子日暮飛鳥歸門前長春水

蘭澗

藝蘭北澗側澗曲風紆餘願言植根固芬芳長慰予

山齋

疊石小崢嶸修篁高下生地偏人跡罕古井轆轤鳴



書樓

高樓出林杪中有千載書昔人不可見倚檻意何如

石瀨

流泉自清寫觸石短長鳴窮年竹根底和我讀書聲

卷雲亭

雲生山氣佳雲卷山色靜隱几亦何心此意相與永

柳堤

前年種垂柳已復如許長長條莫攀折留待映滄浪

月榭

危欄明倒影面面湧金波何處無佳月惟應此地多

濯清亭

芙蓉豈不好濯濯清漣漪采之不盈把怊悵暮忘饑

西嶼

繫舟西岸邊幅巾自來去島嶼花木深蟬鳴不知處

琮琤谷

幽谷竹成陰懸流著石清不妨風月夕來此聽琮琤

梅堤

亭亭堤上梅歷歷波間影歲晚憶夫君寂寞煙渚靜

采菱舟

散策下亭阿水清魚可數却上采菱舟乘風過南浦

題曾氏山園十一詠

錄六首

霜傑

種松苦難長松長還耐久莫作目前思但種門前柳

君子亭

嘉蓮秉嘉質邂逅逢賞音翁豈玩物者寄意一何深

蓼步

扁舟橫薄暮渺渺蓼知秋家山有江湖何必賦遠遊

梅沼

寒梅只自芳野水有餘清山空歲云暮妙意相發明

桃花塢

花開山與明花落水流去行人欲尋源只在山深處

吟風橋

橋邊風月佳  
俛仰有餘思  
無忘履冰心  
方識吟風意

御選宋詩卷六十二

謹案卷六十一第八頁後三行鳴蜩驚早夏刊本

蜩訛蜩據廬陵集改

第三十四頁後八行褰裳望九疑刊本褰訛褰據

陵陽集改

卷六十二第二十八頁後二行迴立正愁絕按大

全集考異愁作幽與此異







總校官庶吉士臣侍 朝

校對官檢討臣蕭九成

謄錄舉人臣李 駟